

La dumonda fatta da l'archiv da duonnas am ha trat adimaint üna cuorta ma bellischma istorgia da l'autur ladin Cla Biert: «Co ch'eu n'ha imprais a chantar». Cla Biert descriva in seis möd fin e precis co cha seis bap til ha muossà a chantar. Cur cha'l bap da Cla Biert vaiva nempe badà cha seis figl nu rabaglia oura tun in stüva, til ha'l fat chantar sülla prada d'munt. El vaiva da far gnir üna lütschernu fin cha quella gniss our da seis zop.

Meis bap nu sa ni chantar ni sunar la guitarra, ma per el d'eira adüna important cha la famiglia saja insembel d'urant ils pasts. Dimena es statta la maisa da chadafö per mai ün lö central, la centrala da la famiglia Stalvies. Üna famiglia da paur, bap e mamma, duos sours chi sun ses e set ons plü veglias, üna sour plü giuvna. Fingia quista constellaziun ün pa speciala, sainza puob, davo ses ons amo üna matta, am ha sgüra fuormada. E fuormada am han eir las discussiuns vi da nossa maisa da chadafö. A la dumonda co ch'eu sun rivada illa politica daja üna simpla resposta: «Eu sun rivada illa politica pervi da nossa maisa da chadafö.»

Dimena, d'urant ils giantars pro la famiglia Stalvies gniva discurrü bier e pac e la differenza d'età tanter mai e las sours grondas d'eira quella jada propcha remarquabla. «Las grondas», Barbla e Domenica, giaivan in scoula secundara intant ch'eu imprendaiva güsta a scriver lià. Davo giantar, bap faiva seis cupid sül banc da chadafö, vaiva nom da lavar e süantar la vaschella e scuar la chadafö avant co ir a scoula. Schi daiva üna segua fixa pro quistas lavurs nu m'algorda plü, eu sa però bainischem ch'eu nu süantaiva giò jent, e lavar giò lavaivan las grondas.

Da che ch'eu m'algord però be precis es ch'üna jada, Aitina vaiva provà da metter sül cheu quistas reglas. D'urant ün giantar quintaivan Barbla e Domenica da las sgrischurs da la seguonda guerra mundiala, da dictaturas e da democrazia. Eu, la mattina da set ons, nun inclegiaiva insomma nügla e n'ha dumandà a mia sour che ch'üna democrazia saja. Cha quai saja l'incuntrari dad üna dictatura, ingio ch'üna persuna cumonda tuot! Cha in üna democrazia hajan tuot ils umans ils listess drets e cha in üna democrazia vaglia mincha vusch, vuol dir il maniamaint da mincha persuna, listess bier.

«Aha», n'haja pensà, «lura es üna democrazia scha no quia vi da la maisa vessan tuots üna vusch e las bieras vuschs decidan sur dad alch?» Precis. Plü co facil nu vaiva simplamaing na vögla da süantar tuot quella muntogna da vaschella. (Eu pudess eir pretender ch'eu vess adüna fingia gnü ün sen da güstia, quasi üna mattina pre-emancipada - tuot quai füssan natüralmaing be falistoccas).



«Eu sun rivada illa politica pervi da nossa maisa da chadafö.»

Aita Zanetti, vicepresidente dal Cussagl grand e vicepresidente communal da Scuol